

အပိတပိတါ **AWIG-AWIG**

၇၃၈၈၂၁၁၁၁၁၁၁၁၁၁၁
DESA PAKRAMAN TONJA



၇၃၈၈၂၁၁၁၁၁၁၁၁၁၁၁၁
DESA PAKRAMAN TONJA - KELURAHAN TONJA

၇၃၈၈၂၁၁၁၁၁၁၁၁၁၁၁၁
KECAMATAN DENPASAR UTARA - KOTA DENPASAR

၇၃၈၈၂၁၁၁၁၁၁၁၁၁၁၁၁
TAHUN 2015

DAGING CAKEPAN AWIG-AWIG

DAGING CAKEPAN AWIG-AWIG	pra	2
Prathamas sargah	ARAN LAN WEWIDANGAN DESA.....	1
Dwitiyas sargah	PETITIS LAN PAMIKUKUH	1
Tritiyas sargah	SUKERTA TATA PAKRAMAN	2
	Palet 1 Indik Krama lan Warga.....	2
	Palet 2 Parajuru lan Sesepeuh Desa	4
	Palet 3 Indik Kukul	8
	Palet 4 Indik Paruman	9
	Palet 5 Indik Druen Desa	11
	Palet 6 Sukerta Pamitegep.....	12
	Karang lan tegal	12
	Pepayonan	13
	Wewangunan.....	14
	Wewalungan.....	14
	Bhaya	15
	Panyanggran Banjar	16
Caturthas sargah	SUKERTA TATA AGAMA	16
	Palet 1 Indik Dewa Yajnya	16
	Palet 2 Indik Rsi Yajnya	24
	Palet 3 Indik Pitra Yajnya	24
	Palet 4 Indik Manusa Yajnya	27
	Palet 5 Indik Bhuta Yajnya	28
Pañcamas sargah	SUKERTA TATA PAWONGAN.....	30
	Palet 1 Indik Pawiwahan.....	30
	Palet 2 Indik Nyapihan.....	31
	Palet 3 Indik Sentana.....	32
	Palet 4 Indik Warisan.....	34
Şařthas sargah	WICARA LAN PAMIDANDA	36
	Palet 1 Indik Wicara.....	36
	Palet 2 Indik Pamidanda.....	37
Saptamas sargah	NGUWAH NGUWUHIN AWIG-AWIG.....	39
Ařthamas sargah	SAMAPTA	39

PRATHAMAS SARGAH
ARAN LAN WEWIDANGAN DESA

Pawos 1

- (1) Desa adat puniki mawasta Desa Pakraman Tonja.
- (2) Jebar kekuwub wewidangannya mawates nyatur :
 - ha Sisi wetan Desa Pakraman Oongan.
 - na Sisi Kulon Desa Pakraman Denpasar.
 - ca Sisi Lor Desa Pakraman Peraupan.
 - ra Sisi Kidul Desa Pakraman Pagan lan Sumerta.
- (3) Desa puniki kawangun antuk gebogan krama makudang-kudang banjar luirnya :
 - ha Banjar Tatasan Klod.
 - na Banjar Tatasan Kaja.
 - ca Banjar Tega.
 - ra Banjar Sengguan.
 - ka Banjar Kedaton.
 - da Banjar Batanancak.
 - ta Banjar Tegehkuri.
 - sa Banjar Tangguntiti.
 - wa Banjar Tegehsari.

DWITIYAS SARGAH
PETITIS LAN PAMIKUKUH

Pawos 2

Desa Pakraman Tonja ngamanggehang pamikukuh minakadi :

ha Pancasila.

- na Undang-Undang Dasar 1945.
- ca Tri Hita Karana manut Sad Acara Agama Hindhu.

Pawos 3

Luir petitis Desa Pakraman Tonja :

- ha Ngukuhang miwah ngrajegang Agama Hindu.
- na Nginggilang tata prawerti magama.
- ca Ngajegang kasukertan saraja druening Desa Pakraman miwah druen pawongan sami.

TRETIYAS SARGAH

SUKERTA TATA PAKRAMAN

Palet 1

Indik Krama lan Warga

Pawos 4

- (1) Sane kabawos Krama Desa Pakraman Tonja inggih punika sahananing warga sane jumenek ring wewidangan Desa Pakraman Tonja, sampun alaki rabi tur sampun tedun mabanjar lan sang mawed saking Desa Pakraman Tonja nanging magenah ring dura desa sampun alaki rabi.
- (2) Sane kabawos warga Desa Pakraman Tonja inggih punika sahananing warga sane jumenek ring wewidangan Desa Pakraman Tonja.
- (3) Sajaba punika sinanggeh tamyu, sane kabinayang dados kalih inggih punika sane magama Hindu, miwah sewosan ring magama Hindu.

Pawos 5

Luir krama Desa Pakraman Tonja :

- (1) Krama ngarep, kulawarga sane wed utawi pangrawuh saking warga desa sewosan saha ajeg pawiwahannya.

- (2) Krama tan ngarep luire krama panyade inggih punika krama sane ngentos ayah krama ngarep wiadin tan ngarep tur sane kadadosang sekaa truna truni ring banjar.
- (3) Krama balu kulawarga ngarep utawi tan ngarep salah sinunggil lanang utawi istrine lina wiadin nyapian. Krama balu inucap kabinayang dados :
- ha Balu makrambian inggih punika balu sane madue sentana dereng marabian.
- na Balu nglisting inggih punika balu tanpa sentana.

Pawos 6

- (1) Ngawit dados krama desa :
- ha Mawiwit pawiwahan tur jumenek ring palemahan Desa Pakraman Tonja lan magenah ring dura desa.
- na Sang ayat ngranjing makrama desa patut atur uning ring prajuru banjar sane ngwidangin genah paumahannyane.
- (2) Panumaya tedun makrama desa nyabran masa manut pararem ring banjar suang-suang.

Pawos 7

Teteganan miwah swadarma krama Desa Pakraman Tonja:

- (1) Teteganan krama luire :
- ha Krama ngarep ayah angkep keni urunan miwah ayahan mamungkul.
- na Krama balu keni ayah manut pararem banjar.
- (2) Krama Desa Pakraman kadadosang :
- ha Mapwangkid tan tedun luire :
- 1 Ritatkala sungkan.
 - 2 Matepetin anak sungkan rahat.
 - 3 Madrue kalinaan.
 - 4 Sedek wenten ring dura desa.
- na Nyada mapiteges lepas ngayah risampun tan mrasidayang makarya.

- ca Mopog ngetut wiadin nutug ayah saha pepeson antuk brana manut pararem, majeng ring krama desa sane magenah ring desa sewosan.
- ra Panyledihi nyada wiadin nyuksukin ayah risampune mayusa 17 (pitulas warsa), turmaning panyledihi punika kenak.

Pawos 8

Kapatutan warga tamiu :

- ha Satinut ring daging awig-awig Desa Pakraman Tonja.
- na Warga tamiu patut madana punia ring Desa Pakraman / banjar.
- ca Warga tamiu polih petias marupa pitulung ring sajeroning katiben panca baya.

Pawos 9

(1) Wusan dados krama desa luire :

- ha Sangkaning pinunas ngraga menawi kesah ka dura desa.
- na Kanorayang duaning sampun tan prasida ngehehin solah maprawerti setata mamurug kecaping awig-awig.
- ca Wusan makrama desa mapiteges taler wusan makrama banjar, utawi wusan makrama banjar mapiteges taler wusan makrama Desa Pakraman mangda sampunang kasinanggeh empak nglanting.

(2) Sang wusan makrama :

- ha Tan polih pah-pahan druen desa utawi druen banjar.
- na Tan polih pasayuban sajeroning ala ayu.

Palet 2

Parajuru lan Sesepeuh Desa

Pawos 10

(1) Prajuru Desa Pakraman Tonja luire :

- ha Sesepeuh Desa Pakraman.
- na Bendesa pakraman sane ngenter Desa Pakraman.
- ca Sabha Desa.
- ra Kerta Desa.
- ka Pecalang.

(2) Parajuru inucap ring ajeng patut :

- ha Mawiwit saking krama ngarep.
- na Uning ring sastra nyurat lan ngwacen.
- ca Mayusa kirang langkung 30 warsa kantos 65 warsa.
- ra Jujur tur malaksana becik.
- ka Tan cedangga.
- da Tan nahenin kanorayanang antuk krama desa.
- ta Kaadegang malarapan antuk pamilihan olih paruman Desa Pakraman utawi manut dresta sane kamanggehang sajawaning wenten pariindikan tiyos dados kapilih malih.
- sa Maduluran piuning ring pura Kayangan Tiga Desa Pakraman Tonja.

Pawos 11

(1) Sabha Desa luire :

- ha Prajuru ngadegang panglingsir sinanggeh sabha desa mawiwit prajuru lepas.
- na Para prajuru Desa Pakraman.
- ca Para manggala desa dinas.
- ra Para sujana Desa Pakraman.
- da Para prajuru sekaa-sekaa ring sajebag Desa Pakraman Tonja.

(2) Kerta Desa kaadegang :

- ha Prajuru ngadegang panglingsir sinanggeh Kerta Desa mawiwit prajuru lepas.
- na Bendesa Desa Pakraman.

- ca Para manggala desa dinas.
- ra Panyarikan Desa Pakraman.
- ka Adiri kasudi olih Bendesa Desa Pakraman sane kaanggehang uning nepasin wicara, nganutin daging awig-awig.
- da Dudonan Kerta Desa sakadi ring sor puniki :
 - 1 Pinaka Kerta Desa Bendesa Desa Pakraman.
 - 2 Manggala desa dinas adiri sane kasudi.
 - 3 Panyarikan : Panyarikan Desa Pakraman.
 - 4 Pangabih Kerta Desa prajuru pecalang, prajuru truna truni, para sujana sane kamanggehang.

(3) Pecalang sane nyanggra kasukertan Desa Pakraman rawuh druen kulawargannya.

(4) Bendesa Pakraman kasanggra antuk :

- ha Patajuh utawi pangliman pinaka panyledihinnyane.
- na Panyarikan pinaka juru surat.
- ca Patengen pinaka pangamong druen desa.
- ra Kasinoman pinaka juru arah akehnya manut kawigunannya.

(5) Sajeroning ngenterang sukertan niskala, Bendesa mingsigihang pamangku Kayangan Desa.

(6) Prajuru ngadegang panglingsir Kerta Desa, sane mawiwit prajuru lepas.

Pawos 12

(1) Swadarmaning Prajuru Desa Pakraman luire, Sesepuh, Sabha Desa, kerta Desa patut ngicenin piteket-petiket lan tuntunan ring prajuru Desa Pakraman.

(2) Swadarmaning Bendesa Desa Pakraman luire :

- ha Ngamargiang sadaging awig-awig miwah pararem desa.
- na Nuntun tur ngenterang krama rawuhing warga desa ngupadi manut petitis.
- ca Mawosin kalih niwakang pamutus marep ring wicara warga desa.
- ra Maka duta matemuang bawos ring sapa sira ugi.

ka Ngenterang aci-aci lan upacara sane kalaksanayang oleh Desa Pakraman Tonja utawi pawongannya suang-suang.

da Maka saksi rikalaning wenten warga Desa Pakraman Tonja nangun karya manut agama Hindu minakadi madengen-dengen, meras oka, miwah sane lianan.

ta Ngenterang sahanan wewangunan ring Desa Pakraman.

sa Mastikayang druen Desa Pakraman lan parhyangannya.

(3) Swadarmaning Panyarikan : *Rekreasi*.

ha Nyurat saluiring rencana wewangunan ring Desa Pakraman.

na Nglaksanayang saluiring ilikita Desa Pakraman.

ca Matajuhin Kelihan Desa Pakraman lan pangliman yening kapialang.

(4) Swadarmaning patengan : *Bendehana*.

ha Ngambel utawi ngraksa saha nyuratang jinah druen desa.

na Nureksain sajeroning druen desa.

ca Ngabih sahananing swadarman prajuru sewosan.

(5) Swadarmaning Kesinoman :

ha Ngarahin sahananing pawarah-warah saking Bendesa Desa Pakraman.

na Ngabih sahananing swadarman prajuru sewosan.

Pawos 13

Patiyas utawi olih-olihan Prajuru utawi Bendesa Desa Pakraman luire :

ha Luput rerampen (pepeson).

na Luput ayah-ayahan.

ca Petiwas sewosan manut pararem.

Pawos 14

Parajuru Desa Utawi Bendesa Desa Pakraman kagentosan riantukan :

Awig-awig Desa Pakraman Tonja

kaca - 7

- ha Lina.
- na Wit saking pakayun utawi pinunas ngeraga.
- ca Kawusan duaning iwang pemargi menawi nilar sesana.
- ra Sampun tutug sengker dados prajuru 5 (limang) masa / warsa.
- ka Sungkan-sungkanan.

Palet 3

Indik Kukul

Pawos 15

- (1) Kukul ring desa luire :
 - ha Kukul Pajenengan ring Pura Kayangan Tiga.
 - na Kukul Banjar.
 - ca Kukul Sekaa-sekaa.
 - ra Kukul ring pura-pura dadia lan ring pura paibon.
- (2) Tabuh tetepakan kukul desa.
 - ha Tengeran upacara yajnya Desa utawi Banjar : ngempang sakadi sane lumbrah.
 - na Tengeran ngawit nglaksanayang pakaryan Banjar utawi Desa manut sakadi arah-arahan : dung, dung, dung dung dung dungdung dung dung dung dungdung dung-dung dung dung.
 - ca Tengeran sinalih tunggil warga Banjar prade lina / seda kasuarayang kukul ageng sakadi lumrah mamargi.
 - ra Tengeran wenten umah pun, bulus....., atulud nglantur suwe (dung dung dung dung dung).
 - ka Wenten kamalingan (bulus atulud dung dung dung).
 - da Tengeran wenten kaamuk, kabaya pati bulus kalih tulud (dung dung dung dung dung dung).
 - ta Tengeran ngwaliang sane mapitulung sawireh sampun degdeg bamban ping tiga (dung dung dung).

- (1) Kulkul Desa Pakraman utawi Banjar tan wenang katepak yening tan sangkaning pituduh Prajuru Desa Pakraman, utawi prajuru Banjar sajawaning katengeran (kapancabayan).
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika, patut sang mamurug kadanda manut pararem.
- (3) Kulkul Sekaa-sekaa samalih kulkul pondokan tan kalugra nyawerin (matchin) sukat utawi tengeran kulkul Desa Pakraman / Banjar, prade mamurug taler kadanda manut pararem.

Palet 4

Indik Paruman

Pawos 17

- (1) Paruman utawi sangkepan ring Desa Pakraman Tonja wenten :
 - ha Paruman Desa Pakraman Tonja.
 - ① Nyabran tigang sasih ring rahina Redite umanis Warigadian lan Redite Umanis Menail.
 - 2 Napkala maka jalaran arah-arah manut tetujon.
 - na Sangkepan prajuru kawentenang manut wiguna.
- (2) Paruman Desa Pakraman Tonja dudonannya sakadi ring sor.
 - ha Sang pacang ngamiletin patut mabusana adat manut dresta.
 - na Tan kalugra makta gegawan, upami blakas, ayam miwah sane sewosan.
 - ca Tan maren ngarcana ring ida Bhagawan panyarikan saha widhi widana miwah cane.
 - ra Tan kalugra ngamedalang bawos gora utawi byuta, yan tan asapunika keni pamidanda pacamil kadi dandaning nguman-uman ring paruman.
 - ka Paruman utawi sangkepan sida lumaksana yan sampun katedunin antuk krama Desa utawi para manggala (Kelihan Banjar) suang-suang akehnyane apah kalih ring akeh Banjar / krama sane patut nedunin.

- da Pamutus bebawos mangda giluk saguluk, utawi kaingkupan punika kamanggehang, yening tan mrasidayang suarane makehan sinanggeh pamutus. ✓
- ta Pamutus sane sampun kasungkemin inucap wenang kaanggen uger-uger geguat tata pangenter ring Desa Pakraman.
- sa Sadurung bebawosan sane pacang kabawosang kablibagin mangda sareng sami ngaturang pangastungkara Om Swastyastu lan risampun sangkepan puput mangda kasineb antuk paramasanthi.
- wa Bebawosan peparuman mangda kakereban dumun manut rerincikannya lan manut parikrama.
- la Yening wenten bebawosan sewos ring pari krama, mangda kabawosin sapuput bebawosan manut parikrama inucap.
- (3) Prade daging paruman tan kacumponin, mangda prajuru Desa ngilikang bawos, saha putusannya mangda kararemin antuk Kelihan banjar / krama desa malih, prade tan prasida kasungkemin jantos ping tiga, parajuru desa dados nunas bawos ring Kerta Desa manut dudonan, luire kamanggala paingkupan prajuru, ngraris panglisir, panguntat paruman malih.
- (4) Pamutus bebawosan mangda kasurat kaanggen ilikita.

Pawos 18

- (1) Sajeroning paruman desa, Bendesa Desa Pakraman patut nglimbakang pamargin ngenterang Desa pamekas ngeninin indik :
- ha Munjuk lungsuring Pakraman saha ayah-ayah, sulur arta brana, druen desa.
- na Pidabdab prajuru ngeninin usaha desa kapungkur.
- (2) Pamutus paruman Desa sinanggeh pararem, maka pamitegep pamargin awig-awig.

Pawos 19

- (1) Paruman parajuru Desa ngwedarang rerincikan usaha Desa kapungkur.
- (2) Paruman prajuru tan wenang kalaksanayang sadurung kapikukuhin antuk paruman desa manut dudonan, sadereng kaingkupan antuk krama desa.

- (3) Pamutus Paruman Prajuru utawi ngwetuang pasuara, maka daging pituduh kawewenang utawi ngonekang pecak pararem krame Desa.

Palet 5

Indik Druen Desa

Pawos 20

- (1) Padruen Desa Pakraman Tonja sakadi ring sor.

ha Kayangan Desa luire.

- 1 Pura Dalem Kayangan Prajapati.
- 2 Pura Desa Bale Agung.
- 3 Pura Puseh Taman nunas tirta pasucian.
- 4 Beji genah pakiyisan lan genah manusa yajnya.

na Bale Desa / wantilan.

ca Pasar desa 1600 M2.

ra Laba Pura Dalem 2775 M2.

ka Laba pura Desa 2800 M2 lan 400m2.

da Setra 10005 m2.

ta Lelanguan minakadi tetabuhan lan ilen-ilen padruen Desa / Banjar luire :

- 1 Gong suang-suang Banjar sajabag Desa PakramanTonja.
- 2 Palawatan Ida Betara.
- 3 Lekita-lekita, luire pipil krama, awig-awig pasuara / pararem.

sa Niyasa, sasanthi.

wa Lembaga Perkreditan Desa (LPD) Desa Pakraman Tonja.

- (2) Olih-olihan Desa Pakraman Tonja luire.

ha Olih-olihan saking palaba pura.

na Urunan Krama Desa Pakraman.

ca Paica saking guru wisesa.

ra Danapunia sewosan sane patut.

Pawos 21

- (1) Prajuru Desa patut ngetangang pamupon laba pura lan sapanunggalan druen Desa.
- (2) Pikolih pamuponnya kaanggen prabeya piodalan saha wewangunan ring Pura miwah anggen kabuatan Desa Pakraman.
- (3) Ring Paruman Desa Prajuru pangamong druen desa ngwentenang pariindikan munjuk lungsuring padruen Desa ring krama desa.
- (4) Sakaluring druen desa patut wenten ilikitannya.
- (5) Tan kalugra ngadol utawi ngesahang padruen Desa yang tan kasungkemin antuk Krama Desa.
- (6) Krama Desa wenang pratyaksa ring druen Desa sami manut ring ajeng.
- (7) Bilih wenten druen Desa sane ical sang sapa sira sane mamandung wenang keni pamidanda manut pararem, saha ngwaliang pepandangan inucap. Yan tan asapunika patut kanorayang manut dudonan.
- (8) Yening wenten druen Desa sane ical, nanging tan kakeniang, utawi tan wenten ngangken ngambil, patut kawentenang padewa saksi manut pasuara.
- (9) Yening wenten warga Desa Pakraman polih nuduk sane mabuat mangda atur supeksa ring prajuru.

Palet 6

Sukerta Pamitegep

Kaping 1

Karang lan tegal

Pawos 22

- (1) Krama Desa sane madue tegal, karang lan carik patut ngwatesin karang, tegal lan carik inucap antuk pagehan / turus utawi tembok mangda pakantennya asri.

- (2) Wates sisi kaler miwah kangin patut kakaryanin antuk sang ngamong karang, sane mawasta gegaleng kaluwan, sajawaning tanah pacatu tegal carik utawi tanah padrueyan ngraga, sane kapiara watese sisi kelod miwah kauh, reh punika mawasta gegaleng kateben.
- (3) Prade karasayang pagehan utawi turus inucap nglikadin, yan pada arsa panyandinge, kengin watese nganggen pinget kewanten kasaksi antuk Prajuru Desa utawi pracihna pal saking Kantor Badan Pertanahan.
- (3) Prade wenten karang kabebeng mangda kautsahayang wenten marginnyane.

Pawos 23

- (1) Sinalih tunggil Krama Desa / Banjar tan kalugra.
 ha Ngalah-alah margi, tegal, karang lan carik druen krama lianan.
 na Ngalah-alah tanah tegak Kahyangan, Setra, lan sakancan tegak sinanggeh suci.
- (2) Prade wenten sakadi ring ajeng, sang ngalah-alah patut ngwaliang tanah inucap saha pamidanda sapatutnya kadulurin upakara ring panglalah tanah suci.

Kaping 2

Pepayonan

Pawos 24

- (1) Ngawit nandur kakayonan tanem tuwuh patut adepa agung ngajeroang saking wates, prade jantos ngliwat wates wenang kasepat gantungan.
- (2) Yening wenten pepayonan ngungkulin samaliha mawastu mayanin kapisaga, patut kawarah antuk paiguman ping ajeng, prasida sang nruenang wit ngrebah utawi notor.
- (3) Prade sampun kawarah taler tan wenten usaha sang nruenang wit sang rumasa katetehan / kajerihang wenang masadok ring prajuru, tur risampun kaparitatas kalugra ngicalang wit inucap.
- (4) Sang kawarah yan tan wenten nglakyanayang pawarah punika patut keni pamidanda panyangaskara saha prabeya ring wewangunan sang karubuhan manut pararem.

- (5) Krama Desa patut ngamanggehang kawerdian tanam tuwuh sane ngawinang desane asri tur lestari.

Kaping 3

Wewangunan

Pawos 25

- (1) Ritatkala ngwangun patut :
- ha Yening ngwangun patut mapaignuman marep ring panyanding.
 - na Yening ring paiguman punika nenten kacumponin patut masadok ring prajuru desa.
 - ca Tan nyayubin kapisaga.
 - ra Tan dados ngembahang toya kapisaga.
- (2) Prade wewangunan jantos nyayubin bilih-bilih temboke ring telenging wates, risampun kawarah tur kasadokang ring prajuru, wenang kadanda manut pararem, saha tembok inucap kagubar utawi sanistane mangda kakaryanang abangan.

Kaping 4

Wewalungan

Pawos 26

- (1) Warga desa sane mamiara wewalungan patut sayaga nitenin negul / nglogor utawi kakaryanang bada mangda tan ngrusakin karang utawi pabianan krama sewos, bilih-bilih, jantos ngranjing ngletehin Kahyangan.
- (2) Prade wenten wawalungan malumbar utawi ngeleb ngrusakin karang / pabianan krama sewos, risampun kawarah kengin kataban tur kadanda ngwaliang wit sane karusak saha nawur panebas pepiaran tetabanan, manut panglokikan Prajuru Desa.
- (3) Prade jantos ngletehin tegak suci minakadi pamrajan (Sanggah Kamulan) lan ngletehin Kahyangan Tiga utawi Pura Pamaksan risampun kaparitatas antuk Prajuru wenang sang nruenang kadanda prabeyaning upakara.

- (4) Krama Desa patut ngrayanin wawalungan miwah sarwa prani, nenten kapatutang maboros paksi miwah nuba ulam lan siosan punika.

Kaping 5

Bhaya

Pawos 27

- (1) Pariindikan bhaya luire : Jiwa Bhaya, Artha bhaya (kapandangan) Geni bhaya, Toya bhaya, Ripu bhaya, Duracara ring agama.
- (2) Sang manggihin kahanan panca bhaya patut nepak kulkul-bulus manut pawos 15 (2) aksara na.
- (3) Prade ring desa kakeniang jiwa bhaya, patut desane ngwentenang bhuta yajnya tur sang ngamayenin katur ring sang ngawawenang.
- (4) Prade wenten jadma mamisuh, utawi nguman-uman jadma tios, kakeninin pamidanda beya pacamil tebasan pamrayascita.

Pawos 28

- (1) Sang manggihin sahanan artha bhaya (kapandangan) patut ngulkul mapitulung, manut ring pawos 15 (2) aksara na utawi sang kamalingan atur uning ring Prajuru Desa sane pacang nanda saha mawuwuh panyanggaskara prade wenten jadma ngamaling barang sinanggeh suci.
- (2) Pratingkahe mapailon ring dusta kabawos ngukubin corah, utawi prade wenten jadma manggihin maling tan nyadokang ring Prajuru jantos jadma siyos nyaduang, patut kadanda kadi dandaning maling, sakueh pangargan wit manut cacakan, tur prade jantos ping tiga malaksana asapunika wenang kasukserah ring sang ngawawenang.
- (3) Prade wenten jadma ngrereh reramon, minakadi daun kelapa, ron miwah sane sewosan tan pasadok ring sang nruenan, prade kacunduk (ketara) patut kadanda kadi dandaning maling.

(4) Yening wenten jadmā ngranjingin pakubon wiadin pakarangan anak sewos rikala suwung, tur tanpawangsit mawastu sang madrue karang kaicalan, wenang jadmā inucap dados kasinanggeh mamaling saha patut madewa saksi ring Pura Desa utawi Bale Agung.

(5) Mangda tan kasinanggeh manut ring ajeng, asing-asing ngranjingin kubon jadmā sios patut :

ha Matenggeran suara (makaukan).

na Nyantos sang madrue karang rawuh utawi masadok ring pangapit pinih tampek, maka buatan pangranjinge.

ra Pamedal karangnya kadagingin sawen, maka cihna wenten pangarah rikala suwung.

Kaping 6

Panyanggran Banjar

Pawos 29

ha Krama Desa rikala ngwentenang karya suka duka patut kasanggra antuk Banjar manut pararem.

na Bilih-bilih karyane dahat, bobot, banjare wenang ngruruh panampih ring Banjar sewosan manut tetuwek Bendesa Desa Pakraman.

CATURTHAS SARGAH

SUKERTA TATA AGAMA

Palet 1

Indik Dewa Yajnya

Pawos 30

Kahyangan sane wenten ring Desa Pakraman Tonja luire :

(1) Panyiwian Desa Pakraman Tonja luire :

ha Kahyangan tiga : Pura Desa utawi Bale Agung, Puseh, Dalem Kahyangan, Prajapati.

- 1 Pura Dalem Bungkeneng. ✓
- 2 Pura Desa lan Bale Agung. ✓
- 3 Pura Desa Batuaji. ✓
- 4 Pura Dalem Kebon Buni. ✓
- 5 Pura Puseh. ✓

na Palinggih paibon lan palinggih dadia luih ipun : .

- 1 Pura Merta Sari.
- 2 Pura Taman sari.
- 3 Pura Maspahit.
- 4 Pura Dalem Pande Majapahit.
- 5 Pura Panti.
- 6 Pura Enteggumi.
- 7 Alas Arum.
- 8 Pura Manik Kentel.
- 9 Pura Dalem Ularan.
- 10 Pura Ibu Sari.
- 11 Pura Maspahit.
- 12 Pura Ibu.
- 13 Pura Ibu Sari.
- 14 Pura Batur Sari.
- 15 Pura Jurit.
- 16 Pura Batur Pande.
- 17 Pura Dalem Selondingan.
- 18 Pura Gunung Agung.
- 19 Pura Dalem Kediri.
- 20 Pura Ibu.

- 21 Pura Dalem Mejong.
- 22 Pura Ibu.
- 23 Pura Pauman.
- 24 Pura Dalem Penangin.
- 25 Pura Ratu Biyang ~~Susanti~~.
- 26 Pura Batan Pole.
- 27 Pura Dalem Karangasem.
- 28 Pura Dalem Pangibung.
- 29 Pura Puiasari.
- 30 Pura Taman.
- 31 Pura Dangka.
- 32 Pura Kebayan.
- 33 Pura Waringin Pitu.
- 34 Pura Tangkas.
- 35 Pura Ibu.
- 36 Pura Sanghyang Dalem.
- 37 Pura Sapuh Jagat.
- 38 Pura Maspahit.
- 39 Pura Taman.
- 40 Pura Dalem Benculuk.
- 41 Pura Batur Sari.
- 42 Pura Ngukuhin.
- 43 Pura Pamuteran Dalem.
- 44 Pura Besakih.
- 45 Pura Panti.
- 46 Pura Ulun Tirta.

- 47 Pura Batur.
- 48 Pura Taman Dauh Tukad.
- 49 Pura Taman.
- 50 Pura Pulasari.
- 51 Pura Tegehsari.

(2) Rahina piotalan suang-suang Kahyangan inucap kadi ring sor puniki :

ha Ring Pura Kahyangan Tiga Luire.

- 1 Pura Desa utawi Bale Agung lan Puseh rikala Purnama Kasa.
- 2 Pura Dalem Kayangan lan Prajapati Saniscara Kliwon Wuku Kuningan.
- 3 Pura Dalem Kebon Buni rikala Buda Manis Medangsia.

④ Pura Desa Batu Aji rikala Purnama Kadasa.

na Ring Pura Pibon lan dadia luire :

- 1 Pura Taman Sari rikala Purnama Kadasa.
- 2 Pura Maspahit rikala Purnama Kapat.
- 3 Pura Dalem Pande Majapahit rikala Purnama Kadasa.
- 4 Pura Merta sari rikala Purnama Kadasa.
- 5 Pura Panti rikala Buda Umanis wuku Medangsia.
- 6 Pura Enteg Gumi Soma Pon wuku Sinta.
- 7 Pura Aras Arum Anggaran Kliwon Wuku Medangsia.
- 8 Pura Manik Kentel Buda Kliwon Pahang.
- 9 Pura Dalem Ularan rikala Buda Kliwon Sinta.
- ⑩ Pura Ibu sari rikala Buda Kliwon wuku Sinta.
- 11 Pura Ibu rikala Buda Wage wuku Merakih.
- 12 Pura Ibu Sari rikala Purnama Kapat.
- 13 Pura Batur Sari rikala Purnama Kapat.
- 14 Pura Jurit rikala Saniscara Pon Wuku Dunggulan.

- 15 Pura Batur Pande rikala Purnama Kadasa.
- 16 Pura Dalem Selunding Soma Pon Sinta.
- 17 Pura Gunung Agung rikala Buda Kliwon Sinta.
- 18 Pura Dalem Kediri rikala Purnama Kadasa.
- 19 Pura Taman rikala Anggara Kliwon Prangbakat.
- 20 Pura Ibu rikala Buda Wage Mrakih.
- 21 Pura Dalem Mejong rikala Anggara Kliwon Medangsia.
- 22 Pura Ibu rikala Purnama wusan buda kliwon Dunggulan.
- 23 Pura Pauman rikala Purnama risampun Anggara Kliwon Medangsia.
- 24 Pura Dalem Penangin rikala Buda Kliwon Pahang.
- 25 Pura Ratu Biyang susuanan rikala Purnama Kadasa.
- 26 Pura Batan Pole rikala Buda Umanis Krulut.
- 27 Pura Dalem Karangasem rikala Buda Umanis Medangsia.
- 28 Pura Dalem Pegibung rikala Purnama Kapat.
- 29 Pura Pulasari rikala Purnama Kapat.
- 30 Pura Tamana rikala Purnama Kapat.
- 31 Pura Dangka rikala Wrespati Umanis Dunggulan.
- 32 Pura Kabayan rikala Buda Wage Menail.
- 33 Pura Waringin Pitu rikala Saniscara Kliwon Wayang.
- 34 Pura Tangkas rikala Buda Cemeng Langkir.
- 35 Pura Ibu rikala Buda Wage Menail.
- 36 Pura Sang Hyang Dalem rikala Buda Wage Ukir.
- 37 Pura Sapijagat rikala Buda Kliwon Ugu.
- 38 Pura Maspahit rikala Purnama Kalima.
- 39 Pura Taman rikala Purnama Kapat.
- 40 Pura Dalem Benculuk Soma Kliwon Kuningan.

- 41 Pura Batur Sari rikala Buda Wage Klawu.
 - 42 Pura Ngukuhin rikala Soma Kliwon Krulut.
 - 43 Pura Pemuteran Desaa Buda Cemeng Menail.
 - 44 Pura Besakih rikala Buda Wage Merakih.
 - 45 Pura Panti rikala buda Kliwon Pahang.
 - 46 Pura Ulun Tirta rikala Buda Kliwon Pahang.
 - 47 Pura Batur rikala Buda Wage Merakih.
 - 48 Pura Taman Dauh Tukad rikala Anggara Kliwon Prangbakat.
 - 49 Pura Tegehsari rikala Purnama Kapat.
- (3) Pangaci ring Pura inucap manut kecap sastra Agama, saha kalaksanayang nista, Madya, Utama olih pangamong manut dresta niwah pararem suang-suang.

Pawos 31

- (1) Ring suang-suang Pura inucap kewentenang pamangku.
- (2) Ngadegang pamangku nganutin dudonan :
 - ha Turunan utawi ngwaris (pratisentana sane kaselang widhi).
 - na Nyanjan utawi nuwur mapiteges mapinunas ring ajeng panataran Pura.
 - ca Kapilih olih Krama Desa.
- (3) Tan kawenangang ngangge pamangku, luire:
 - ha Cedangga.
 - na Sang sapa sira ugi sane tan kapatutang antuk pararem.
 - ca Sakit ila, Ayan, Buduh, miwah sakit tan sida katambanin.
 - ra Sane madrebe parilaksana tan becik.
- (4) Prabea kapamangkuan:
 - ha Ngwintenang pamangku kamedalin saha klaksanayang antuk sang ngadegang, makadi krama desa utawi pangempon pura suang-suang.

na Yening wenten pamangku Kahyangan Tiga (Pura Dalem, Pura Desa, Kahyangan Prajapati) sane lina, upakara palebon rawuh panyekahan patut kakaryanang olih Krama Desa rawuh ring upakara madya.

(5) Pamangku patut ngamanggeling sesanan miwah agem-ageman pamangku.

Pawos 32

(1) Swadarma pamangku luire :

ha Ngenterang upacara piodalan ring Kayangan utawi ring suang-suang pakubon krama.

na Tan wenang salab-sulub, yan mamurug wenang pamangku inucap nyepuhin raga.

ca Prade silih sinunggil pamangku kapialang utawi cuntaka, kengin nyelang pamangku kayangan tiga sewosan.

ra Samalih yan sampun pamangku ngayah tigang rahina ring pura kancit wenten kulawargannya utawi pisaga lan pangarep lina, pamangku inucap tan keneng cuntaka, sakewanten pamangku tan budal salami piodalan.

(2) Petias utawi olih-olihan pamangku.

ha Panyolasan miwah sarin canang.

na Luput pakaryan luput pepeson.

Pawos 33

(1) Pamangku kagentosan riantukan :

ha Lina.

na Pinunas ngraga, menawi kageringan lan sapanunggalannya.

ca Kawusan antuk krama menawi malaksana sane tan patut (asta dusta).

(2) Prade pamangku kawusang sangkaning malaksana asta dusta, keni pamidanda manut pararem.

Kasukertan Kahyangan ring Desa.

- (1) Sane nenten kalugra ngranjing ka Pura luire :
- ha Sang katiben cuntaka, makadi sebel ngraga.
 - 1 Sebel kandel, ngraja swala, salami dereng mabersih.
 - 2 Sebel madue putra karuron sajeroning 42 rahina.
 - 3 Sebei pangantenan sadereng mabyakala.
 - 4 Cuntaka sangkaning kapademan manut senger.
 - na Makta sahananing sane kasinanggeh ngletehin.
 - ca Wewalungan suku pat, sajawananing ritatkala mapapada.
 - ra Mabusana sane tan manut kadi tata caraning ngranjing ka Pura.
 - ka Anak alit sadereng mayusa tigang sasih.
- (2) Busana ngranjing ka Pura wenang nganutin dresta minakadi :
- ha Ritatkala ngaturang ayah mawastra lan nylempot.
 - na Ritatkala ngaturang sembah, mabusana jangkep.
 - ca Sewosan kadi ring ajeng nenten kalugra sajawaning sampun pituduh prajuru.
- (3) Parilaksana tan kawenangang ring pura luire :
- ha Mabawos sane kasinanggeh wak parusia, wak capala.
 - na Makoratan / mabacin, mawarih masanggama.
 - ca Masumpah utawi macoran sajawaning pituduh prajuru desa.
 - ra Ngias raga sajawaning pandita miwah pinandita.
 - ka Munggah tedun palinggih sajawaning pituduh prajuru desa.
- (4) Sang mamurug kadi kecap ring ajeng keni pamidanda pamrayascita sapatutnyane.

Pawos 35

- (1) Yan wenten jadma ring Pura sane kasumangsayan, kengin patut katatasang, prade yan tan wlahti jadma inucap sakadi pawos ringajeng kasisipang manut pararem.
- (2) Prade kahyangan kahanan durmanggala minakadi kapanca baya pamangku patut digelis nyadokang ring prajuru mangda marumang krama Desa tur ngwentenan upacara sapatutnyane.

Palet 2

Indik Rsi Yajnya

Pawos 36

- (1) Sang pacang madeg pandita utawi madwijati patut masadok ring prajuru Desa kalih Parisada Hindu Dharma Indonesia.
- (2) Prajuru Desa patut nitenin tur wenang ngelingang prade wenten kacihna lempas ring kakecap miwah dresta.
- (3) Sang dwijati polih leluputan ayahan lan pepeson.

Palet 3

Indik Pitra Yajnya

Pawos 37

Dudonan pamargin pitra yajnya.

- (1) Pangupakaran sang lina.
ha Antuk mendem utawi ngeseng.
na Maupacara pangabenan utawi palebon.
- (2) Upacara-upacara Pitra Yajnya riwusan kaabenang mawastu raris mamukur tur kalanturang nglinggihang dewa pitara.
- (3) Yan anak istri mobot tur lina tan wenang kapendem sadurung bobotannya embas.

- (4) Prade wenten anak lina ring carik, tegalan, sang madrue layon utawi warisnya, patut keni pamreycita, kalaksanayang ring genah inucap, sasampune masengker asasih pitung rahina (42 rahina).
- (5) Tan wenang ngengkebang anak lina.
- (6) Tata titi ngangge setra :
- ha Mangda manut kadi dresta lan pituduh prajuru.
- na Tan kalugra ngangge gegemuk antuk semen utawi bebeton lan sane sewosan.
- ca Tan kalugra mendem ring setra Desa Pakraman Tonja anak lianan sane tan magama Hindu.
- ra Ngangge setra patut sakadi tata cara Agama Hindu ring Bali.

Pawos 38

Swadarmaning lan tetegenan krama prade wenten sinalih tunggil warga lina :

- (1) Sang madrue kalinaan patut.
- ha Nyadokang ring prajuru Desa.
- (2) Swadarmaning Banjar / Desa.
- ha Kelihan Banjar maritatanng pamargin sang kaduhkitan.
- (3) Rikala piodalan ring Pura Kahyangan Tiga, tan kadadosang mendem utawi ngaben, prade wenten silih sinunggil krama lina benjang piodalan, kadadosang mendem nyilib tan kadadosang ngaben.
- (4) Pamargin pamendeman utawi palebonan mangda nganutin sastra agama lan dresta.
- (5) Yan wenten anak tiyos tan makrama ring Desa Pakraman Tonja sane lina tur pacang mendem / ngaben ring Setra Desa Pakraman Tonja sajeroning magama Hindu patut :
- ha Atur uning ring prajuru Desa Pakraman Tonja nunas kabebasan pamargi inucap.
- na Keni jinah pananjung batu akehnyane manut pararem.

(1) Sane kasinanggeh kacuntakan sakadi ring sor :

ha Cuntaka antuk lina.

na Cuntaka antuk rajaswala.

ca Cuntaka antuk ngembasang putra.

ra Cuntaka antuk karuron.

ka Cuntaka antuk pawiwahan.

da Cuntaka antuk gamia gamana.

ta Cuntaka antuk salah timpal.

sa Cuntaka antuk yening anak istri mobot nenten kaupacarain pabyakaonan tur pawidiwidanan.

wa Cuntaka antuk mamitra ngalang.

(2) Sengker cuntaka manut kawentenannya.

ha Cuntaka kalayu sekaran, cuntakannya ngantos makelud manut dresta.

na Cuntaka ngraja swala, tigang rahina ngawit saking ngraja swala utawi salamining ngraja swala.

ca Cuntaka ngembasang putra, 42 rahina (abulan pitung dina) ngawit putrane embas utawi ngantos sampun kaupakara makekambuhan tur maprayascita manut sakadi agama lanang wiadin istri.

ra Cuntaka karuron abulan pitung dina (42 rahina) tur sampun makelud.

ka Cuntaka pawiwahan, cuntakannya ngantos sasampune maupakara makala-kala.

da Cuntaka gamia gamana, cuntakannya ngantos sasampune kapalasang / masepihan tur sampun kawntenang pamrayascita raga tur sampun kawntenang pamrayascita ring Pura Desa Pakraman / Kayangan.

ta Cuntaka salah timpal kapuputang sakadi ring agama Hindhu tur dresta / adat.

sa Cuntaka anak istri mobot sangkaning lokika sanggraha nenten kawntenang upakara pabyakaonan, cuntakannya ngantos kawntenang upakara pabyakaonan.

wa Cuntaka mamitra ngalang cuntakannya ngantos kawentenang upacara pabyakaonan pamrayascita.

la Ngembas putra nenten kawentenang upakara pawidi widanan, cuntakannya ngantos wenten sane mameras sang putra, tur sampun kawentenang upakara sakadi ring pawarah-warah agama Hindhu.

Cuntaka kalayu sekaran utawi kapademan.

(3) ha Kapemdem cuntakannya :

1 Cumtaka / sebel kabanjar rauhiing tigang rahina riwusan mendem utawi sasampun polih prayascita / masapuh.

2 Kulawargannya sajeroning pakarangan ngantos manut dresta.

na Kaaben cuntakanya :

Sang nyambut karya pitra yajnya cuntakannya ngawit saking ngrancang karya rauh riwus yajnyannya (mapepegat).

(4) Tan keneng cuntaka luire :

ha Sang Sulinggih.

na Pamangku Kahyangan tiga rikala piodaian.

Pawos 40

(1) Atiwa-tiwa utawi pangabenan kamargiang madasar antuk sastra Agama miwah dresta.

Palet 4

Indik Manusa Yajnya

Pawos 41

(1) Manusa Yajnya inggih punika upacara-upacara darmaning kauripan manusa ngawit saking patemoning kama bang lan kama petak sajeroning garba ngantos pawiwahan.

(2) Upacara kadi ring ajeng madudonan kadi ring sor.

ha Magedong-gedongan duk pangrempinian I biyang.

- na Duk sang rare medal.
- ca Kepus udel.
- ra Roras rahina.
- ka Tutug kambuhan (42 rahina).
- da Tigang sasihan (tigang bulan).
- ta Pawetuan / oton / odalan 6 sasih.
- sa Tutug kelih (ngraja swala sane wadon, ngembakin sane lanang).
- wa Matatah / mapandes.
- la Mawiwaha.

- (3) Upacara-upacara inucap ngamargiang nista, madia utama manut sastra agama miwah dresta.
- (4) Rikala kawentenan upacara pawiwahan patut kasaksiang oleh Jero Bendesa Desa Pakraman Tonja lan Kelihan Banjar (prajuru Banjar).
- (5) Sapa sira ugi sane ngambil rabi ring wewidangan Desa Pakraman Tonja saking dura desa keni jinah sarin upasaksi kehnya manut pararem.

Palet 5

Indik Bhuta Yajnya

Pawos 42

- (1) Bhuta Yajnya inggih punika upacara-upakara marupa : byakala, caru, labaan aci lan pakelem miwah sane sewosan.
- (2) Upacara pabyakala ring pertiwi, kahyangan lan bebhutan kawastanin macaru.
- (3) Pacaruan inucap ring ajeng nista, madia utama manut wiguna kadi ring sor.

- ha Eka sata.
- na Panca sata.
- ca Panca sanak.
- ra Panca Klud.

ka Resi gana.

da Tawur.

- (4) Sajawaning sakadi ring ajeng kawentenang upacara :
ha Mabanten utawi jotan saiban wusan maratengan.
na Masapuh-sapuh rikala pacang wali ring pura.

Pawos 43

- (1) Nangken warsa rikalaning Tilem Kasanga kawentenang Caru Kasanga kalanturang ngrupuk, maka cihna pacang mapag rahina Panyepian benjangne.
- (2) Eedan pamargin mapag rahina panyepian sakadi ring sor:
ha Melis, masucian nganutin dresta.
na Ring suang-suang paumahan kawentenang upacara manut sakadi pituduh saking Parisadha Hindhu Dharma.
- (3) Brata panyepian sane kamargiang antuk krama Desa.
ha Amati geni : tan kengin maapi-api.
na Amati karya : tan kengin nyambut karya.
ca Amati lelanguan : tan kengin maseneng-seneng, masuara gora, lan sapanunggalannya.
ca Amati lelungan : tan kengin malelungan mrika-mriki.
- (4) Pabratan inucap kamargiang saking dauh ro ngantos dauh ro benjangannyane.
- (5) Sang mamurug kecaping ring ajeng, keni pamidanda manut pararem ring suang-suang banjar kamargiang antuk Pecalang Desa Pakraman Tonja.
- (6) Riwus rahina nyepi (benjangne) makacihna pangawit Isaka Warsa patut suang-suang warga Desa Pakraman Tonja sami saling ngaksama (Dharma Shanti).

PANCAMAS SARGAH
SUKERTA TATA PAWONGAN

Palet 1

Indik Pawiwahan

Pawos 44

- 1) Pawiwahan inggih punika patemoning purusa predana, malarapan panunggalan kayun suka cita, kadulurin upasaksi sekala niskala.
- (2) Pamargin pawiwahan luire :
 - ha Pepadikan.
 - na Ngrorod, marangkat riyin wawu kakrunayang.
 - ca Nyeburin utawi nyentana, nyeburin risampun kainanggala antuk upacara.
- (3) Pidabdab sang pacang mawiwaha patut :
 - ha Sampun manggeh daha teruna.
 - na Sangkaning pada lila (tan kapaksa).
 - ca Kamargiang sudi wadani prade pangambilan tios agama.
- (4) Yening wenten warga dura desa ngambil rabi, sang sane ngambil rabi ring Desa Pakraman Tonja patu nyarinin upasaksi manut pararem.
- (5) Pamargin pawiwahan mangda nganutin Undang-Undang Perkawinan saking Sang Ngawawenang.

Pawos 45

- (1) Pawiwahan sane kapatutang ring Desa Pakraman Tonja sakadi ring sor :
 - ha Sampun kamargiang pakalan-kalan utawi pasakapan kasaksinin antuk tri upa saksi inggih punika manusa saksi, bhuta saksi lan dewa saksi.
 - na Prajuru patut mapakelingang utawi ngilikitayang pawiwahan.
- (2) Pawiwahan sane tan manut kadi ring ajeng sinanggeh tan pastika.

Indik Nyapihan

Pawos 46

- (1) Pawiwahan prasida kawusang malarapan antuk palas marabian utawi kapademan.
- (2) Wusan mapikuren riantukan salah sinunggil lina mapiteges balu, minakadi balu lanang utawi istri.
- (3) Palas marabian inggih punika sangkaning mawiwit wicara.
- (4) Sang ayat palas marabian patut atur supeksa pailikitan riyin ring sang runawos (Pengadilan Negeri) wastu tinas apadang pamutuse kabawos nyapian, wawu prajuru / dulu nyiarang kawentenannya ring desa.
- (5) Nyapian ring ajeng patut kalanturang Upacara upakara mapamit ring mrajan sang purusa nglantur mapamit ring mrajan predana kasaksiang antuk prajuru suwang-suang.
- (6) Sang madrue nyapian patut matur piuning ring prajuru Banjar suang-suang.

Pawos 47

- (1) Tata cara palas marabian sakadi ring sor :
 - ha Nawur prabea prasaksi sinalih tunggil sami matenge ring sang runawos.
 - na Pagunakayan polih pahan pada.
 - ca Pabekel, tadtadan suang-suang kakuwasaang niri-niri, sakewanten indik warisan kakuasaang antuk purusa.
 - ra Ngweruhin miwah ngupajiwain pratisentana manut swadarmaning guru rupaka.
 - ka Nawur pamidanda manut dresta.
- (2) Prade riwekas sang palas marabian kacihna adung malih patut :
 - ha Ngamargiang pawiwahan malih.
 - na Kadanda nikel saking palase.

Pawos 48

(1) Sang balu kabinayang dados :

ha Balu luh wit sentana (sentana rajeg), miwah balu luh boya sentana.

na Balu muani kapurusa (wit sentana) miwah balu muani nyeburin (boya sentana).

(2) Swadarmaning balu inucap patut :

ha Ngamanggehang patibrata tan patut ngamargiang para dara / drati krama .

na Ngwasayang waris gunakaya, tan dados ngadol, ngadeang, makidihang lan sewosan punika, sajawaning kabebasan sakeng pianak utawi kulawarga pinih tampek sakeng rabine prade okane kantun alit-alit.

ca Kengin ngidih sentana prade wenten kacumpuin antuk kulawarga sinanggeh kapurusa.

ra Kawenangang mawiwaha malih, prade wenten kabebasan saking warga kapurusa.

(3) Balu kaucap tan pageh sakadi ring sor.

ha Drati krama utawi para dara.

na Matilar saking pakubon tan pasadok jantos enem (6) sasih.

ca Lempas ring swadarma sewos-sewosan tan prasida ngesehin solah maprewerti marep ring pituduh kulawarga purusa.

Palet 3

Indik Sentana

Pawos 49

(1) Sentana wenten kalih pawos sane kaucap prati sentana miwah sentana peperasan.

(2) Prati sentana inggih punika sane metu saking pawiwahan kapatut.

(3) Prade pawiwahan tan ngwetuang sentana kengin ngidih sentana antuk upasaksi sekala niskala sane kawastanin sentana peperasan.

(4) Prade pawiwahan tan kapatut ngwetuang sentana, mangda tan kantun kawastanin bebinjat utawi astra, patut kamanggala antuk panyangaskara.

- (5) Sentana rajeg inggih punika parati sentana wadon, (Pradana) sane kamanggehang lanang (purusa) tur risampun nglaksanayang pawiwahan nyeburin.
- (6) Sang sane kaarsayang sentana rajeg inucap wiwit (5) inggih punika:
- ha Prati sentana wadon tunggal utawi salah sinunggil prati sentana wadon yanin makasami prati sentana wadon.
- na Sampun kamanggehang dados pratisentana antuk purusa, kapawiwahang kaceburin kautamayang antuk jadmā sane maagama Hindhu utawi jadmā sane maagama sewosan sane sampun malaksanayang pamarisuda raga utawi sudi wadani.
- ca Sane kamanggehang sentana rajeg patut mapasadok ring prajuru Banjar tur Kelihan Banjar patut nyiarang ring Banjar saha ngaturang ring prajuru Desa Pakraman.

Pawos 50

- (1) Ngamanggehang sentana manut dudonan patut makacihna arta brana pamerasan sane kasaksiang sekala niskala.
- (2) Sapa sira ugi krama pacang ngidih sentana patut masadok ring prajuru Banjar rauhing Desa asasih sadereng pamerasan.
- (3) Prajuru nyiarang ring wewidangan Desa, sang sapa sira ugi rumasa tan lila mangda nguningang masengker kalih wuku sadurung pamerasan ring Bendesa Pakraman.
- (4) Prajuru digelis mawosin saha ngicenin pamutus nepek ring catur dresta miwah pararem.
- (5) Prade sulur peperasan tan manut ring kecaping ajeng prajuru utawi wenang ngandeg sang pacang malaksana, saha ngicenin pamutus mangda kapuputang riin bebawosan sulur utawi wicarannya.

Pawos 51

- (1) Peperasan sane kapatut ring desa risampun makacihna :
- ha Widi widana pamerasan.
- na Kasaksinin antuk prajuru Desa sane makelingang utawi ngilekitayang.

- ca Kasiarang ring wewidangan desane.
- (2) Sane kapatut peras angge sentana kadi ring sor :
- ha Jadma maagama Hindhu.
- na Kulawarga saking purusa prade tan wenten kengin saking wadon yening taler tan wenten wawu kengin sakama-kama (sakita kayun) manut dresta.
- ca Kautamayang saking waris pancer kapurusa.
- ra Sinalih tunggil mawiwit saking kulawarga tunggal sanggah utawi mrajan, paibon lan dadia, utawi ngambil anak tios sakewanten sang maagama Hindu.
- (3) Kengin ngangkat sentana langkung ring adiri, lanang wiadin wadon.

Palet 4

Indik Warisan

Pawos 52

- (1) Warisan inggih punika arta brana saha ayah-ayahan ngupadi sukerta sekala niskala saking kaluhurannya marep ring turunannya.
- (2) Kang sinanggeh warisan luire :
- ha Due tengah, sanggah, mrajan, pusaka lan sane siosan.
- na Paguna kayan, tadtadan / jiwa dana, hutang piutang.
- (3) Wawu kengin kabawos warisan prade wenten :
- ha Sang ngwarisang.
- na Katurunan (ahli waris).
- ca Artu brana, tetegenan (ayah-ayah) maka cihna warisan.

Pawos 53

- (1) Ahli waris luire :
- ha Pratisentana purusa.

na Pratisentana (sentana rajeg).

ca Sentana peperasan lanang / wadon.

(2) Prade tan wenten sakadi ring ajeng kang sinanggeh ahli waris :

ha Turunan Purusa pernah ngunggahang mekadi rerama lanang, pekak salanturnya rerama misan mindon.

na Turunan purusa pernah kasamping mekadi kaponakan, kaponakan dimisen miwah kaponakan dimindon.

(3) Swadarmaning ahli waris patut :

ha Nrima saha nguasayang tetamian pahan kaluhurannya, mekadi ngrempon sanggah / mrajan, Pura, saha pangupa karyannya miwah ayah-ayahan pawaris.

na Ngabenang pawaris saha nglanturang upacara-upacara Pitra Yajnya.

ca Naurin hutang-hutang pawaris manut panglokika.

Pawos 54

Mungguing waris kawaris ring Desa Pakraman Tonja :

(1) Risampun kalaksanayang Pitra Yajnya lan hutang-hutang pawaris tuntas katawur wawu warisan dados kepah.

(2) Para ahli waris sami polih pahan sangkaning pagunakaya, sajawaning karang / tegal ayahan desa kaemong antuk ahli waris kang sinanggeh krama ngarep.

(3) Sinalih tunggil ahli waris kengin tan polih pahan prade :

ha Nilar kawitan lan sesananing Agama Hindu.

na Sentana rajeg kesah mawiwaha utawi pratisentana nyeburin suang-suang kabawos ninggal kadaton.

(4) Boya ahii waris kengin muponin hasil anut dudonan luire :

ha Sentana luh, salami durung kesah mawiwaha.

na Balu luh wiadin muani nyeburin suang-suang boya sentana.

- (5) Pawaris kengin maweweh rikala maurip pinaka jiwa dana, tadtadan / bekel maka cihna paweweh tetep ring oka sane kesah mawiwaha.

Pawos 55

- (1) Prade sajeroning pakulawargan wenten ahli waris langkungan ring adiri patut :
- ha Kawentenang paigum indik pahan waris inucap.
 - na Yan tan prasida, katunasang tetimbang ring prajuru / panglingsir Desa.
 - ca Prade taler tan wenten cumpu ring panepas prajuru patut karauhang ring Sabha Desa, taler tan kacumponin katur ring majelis desa Pakraman Alit utawi paling unkur wawu ring sang rumawos (Pengadilan Negeri).
- (2) Prade karang inucap kaputungan, patut prajuru nibakang ring :
- ha Sang sinanggeh ahli waris manut pawos 53.
 - na Sang kengin anggen sentana manut pawos 54.
 - ca Prade taler tan wenten cumpu ring panepas kerta desa kengin katunasang ring wiwit siki aksara ca ring ajeng.

SASTHAS SARGAH

WICARA LAN PAMIDANDA

Palet 1

Indik Wicara

Pawos 56

- (1) Sane wenang mawosin makadi mutusang wicara ring desa inggih punika : Prajuru Desa sinanggeh Kerta Desa.
- ha Kelian Banjar, pradene sang mawicara sane patunggilan banjar.
 - na Bendesa Pakraman prade sang mawicara sami-sami ring patunggalan Desa Pakraman.

- (2) Tata dudonan mawosin saha muputang wicara warga desa Pakraman kadi ring sor :
- ha Kaping ajeng kabawosin antuk Kelihan Banjar.
 - na Tan cumpu ring panepas Kelihan Banjar katunasang ring panglingsir Banjar.
 - ca Panglingsir Banjar / Kerta Banjar tan kacumponin katedunang ring paruman banjar.
 - ra Paruman banjar tan kanutin kengin nunasang ring Bendesa Pakraman.
 - ka Bendesa Pakraman tan prasida muputang, katincapang ring panglingsir sinanggeh Kerta Desa.
 - da Prade taler pamatut panglingsir desa tan kacumponin katunasang ring paruman desa, sinanggeh wasananing pamutus ring desa, prade pamutus ring desa, taler tan kacumponin kengin nunas pamuput ring Manggala Pakraman miwah utama saderenge kalanturang ring sang rumawos utawi Pengadilan.

Pawos 57

- (1) Sahanan wicara mawiwit kacorahan sakaluire sinanggeh nungkasin daging awig-awig, pasuara, miwah pararem Desa utawi Banjar. Prajuru Desa patut digelis mawosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panapase patut pastika nyantenang iwang patut malarapan Tri Pramana (saksi, lekita, bukti) miwah tan maren nepek ring Catur Dresta.

Palet 2

Indik Pamidanda

Pawos 58

- (1) Desa utawi Banjar wenang niwakang pamidanda ring warga Desa utawi Banjar sane sisip.
- (2) Paniwak inucap kamargiang olih Bendesa utawi Kelihan Banjar.

(3) Bacakan pamidanda luire :

ha Ayahan panukun kasisipan.

na Danda arta (dosa danda saha panikelnya miwah panikel-panikel urunan).

ca Rerampagan.

ra Kasepekang.

ka Kawusang kanorayang makrama utawi kawaliang pipilnyane.

da Panyanggaskara.

(4) Pamidanda sane katiwakang patut masor singgih manut ring kasisipane utamannya kamanggehang kasudamaian desa.

(5) Jinah utawi raja brana pamidanda ngranjing dados due desa utawi Banjar.

Pawos 59

(1) Krama sane langkung ring tigang paruman ngiantur tan naur urunan miwah dedandan wenang karampag.

(2) Rerampagan ngangge tata cara kadi ring sor.

ha Kalaksanayang antuk prajuru kasarengin antuk krama desane saakeh tigang diri maka saksi.

na Sang ngrampag saking darsana ngambil barang utawi nyawenin tanem tuwuh, akehnya manut ring utang sang karampag.

ca Parajuru miceketang mangda barang-barang sane karampag digelis katebus, masenger awuku ring rahina pacang kaadol.

ra Tan patut karampag saluir barang sane patut inggilang manut agama miwah mademang pangupa jiwa sang karampag.

Pawos 60

(1) Prade sang pacang karampag ngwara (ngalengin) pamargi inucap mawastu sampun tan nganutin awig-awig desa, wenang kasepekang.

- (2) Samalih yan purun taler ngalangin paridabdab kadi ring ajeng makudang-kudang paruman kaicen patinget, tan wenten pamargi, sajawaning kawaliang pipilnyane (kawusang makrama).
- (3) Pamidanda inucap ring ajeng mawastu tuntas risampun sang kaangkenin :
 ha Nunas geng sinampura ring krama desa utawi Banjar riantukan piwal ring pasubaya pararem pecak.
 na Nawur pangargan panguak pasubaya duk pacang karampag kadulurin prayascita.

SAPTAMAS SARGAH
NGUWAH NGUWUHIN AWIG-AWIG

Pawos 61

- (1) Nguwah-nguwihan awig-awig Desa puniki kamargiang antuk paruman Desa.
- (2) Paruman inucap mangda kadasarin antuk pakarsan krama Desa Pakraman yadiastun kamedalang antuk prajuru sinunggal wiadin sinarengan.

Pawos 62

- (1) Sakaluwiring sane wenten sadurungnya patut kaanutang ring sadaging awig-awig puniki.
- (2) Sakaluiring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem.

ASTAMAS SARGAH

SAMAPTA

Pawos 63

- (1) Awig-awig puniki kawastanin Awig-Awig Desa Pakraman Tonja.
- (2) Awig-awig puniki kamargiang ngawit kaingkupan utawi kararemin.

- (1) Awig-awig puniki kasungkemin ring paruman, duk rahina Anggara Kliwon Wuku Tambir Isaka warsa 1926, tanggal 5 Oktober 2004 ring Pura Desa Puseh lan Bale Agung Desa Pakraman Tonja.
- (2) Awig-awig puniki kalingga tanganin antuk Bendesa, kasarengin Kelihan-Kelihan Banjar, kasaksinin antuk Kepala Lingkungan miwah Kepala Kelurahan sawewidangan Desa Pakraman Tonja saha kakukuhang antuk Walikota Denpasar.
- (3) Luir sang ngingga tanganin :
 ha. Prajuru Desa lan Kelihan Banjar :

Panyarikan Desa Pakraman Tonja

Bendesa Desa Pakraman Tonja.

Made Suryana

Wayan Pudja

Made Suryana.

Wayan Pudja.

Kelihan Pantus Br. Tatasan Klod

Kelihan Pantus Br. Tatasan Kaja.

[Signature]

[Signature]

Kelihan Pantus Br. Tega

Kelihan Pantus Br. Sengguna.

[Signature]

[Signature]

Kelihan Pantus Br. Tegehkuri

Kelihan Pantus Br. Kedaton.

[Signature]

[Signature]

Kelihan Pantus Br. Tangguntiti

Kelihan Pantus Br. Batanancak

[Signature]

[Signature]

Kelihan Pantus Br. Tegeh Sari

I. MB. ARDANA

Awig-awig Desa Pakraman Tonja

kaca - 40

[Signature]
[Signature]

na.Manggala Prajuru Dinas, pinaka saksi-saksi:

Kepala Kelurahan Tonja



Nip. 600006157.

Plt. Camat Denpasar Timur.



Mengetahui :

Wajikota Denpasar.

